

04 MAY 2003

MIC-Resolusi

PERKENALKAN KELAS AGAMA UNTUK SEMUA KAUM, KATA PEMUDA MIC

KUALA LUMPUR, 4 Mei (Bernama) -- Kementerian Pendidikan perlu memperkenalkan kelas agama untuk semua kaum dalam sistem pendidikan negara agar masalah sosial dikalangan pelajar-pelajar sekolah dapat dikurangkan.

Pemuda MIC dalam satu resolusi yang diluluskan di perhimpunan agung pergerakan itu berkata keberkesanan pendidikan moral sekarang dalam mendidik generasi muda tidak seperti yang diharapkan dan ia tidak dapat membendung gejala sosial.

"Kita menyeru kepada Kementerian Pendidikan agar memperkenalkan kelas agama untuk semua kaum bersama pendidikan moral di semua peringkat demi membawa penyelesaian yang lebih munasabah dalam membendung gejala sosial," kata resolusi itu.

Selain daripada resolusi ini, sembilan resolusi lain diluluskan sebulat suara oleh perwakilan Pemuda MIC ke mesyuarat agung tahunannya yang diadakan di Pusat Dagangan Dunia Putra di sini hari ini.

Pemuda MIC juga inginkan Kementerian Perumahan dan Kerajaan Tempatan mengarahkan pihak berkuasa tempatan supaya membentuk satu jawatankuasa khas terdiri daripada pegawai yang beragama Hindu untuk mengendalikan pemindahan kuil-kuil Hindu.

"Kita kesal dengan tindakan meroboh rumah ibadat oleh pegawai yang bukan penganut agama tersebut. Ini amat sensitif kepada mana-mana kaum dan agama. Ia juga boleh mencetuskan konflik dan gangguan emosi masyarakat setempat," kata resolusi itu be.

Pergerakan itu juga meminta Perdana Menteri Datuk Seri Dr Mahathir Mohamad selaku Pengerusi Barisan Nasional memperuntukkan lebih banyak kawasan Parlimen dan kerusi Dewan Undangan Negeri berdasarkan prestasi dan "track record" parti itu dalam pilihan raya umum akan datang.

Pemuda MIC juga inginkan Kementerian Pembangunan Usahawan meningkatkan pencairan dana untuk usahawan muda kaum India dan melonggarkan syarat pinjaman demi kestabilan sosio-ekonomi masyarakat sejagat.

Sementara itu Wanita MIC dalam mesyuarat perwakilannya meluluskan sembilan usul dan mendahului senarai itu ialah menyokong Dr Mahathir dan presiden parti S. Samy Vellu. Pemuda MIC juga meluluskan dua usul menyatakan sokongan kepada kedua-dua pemimpin itu.

-- BERNAMA

SR MFJ ZB